

16 NOV 1999

MCA GUGUR DUA ANGGOTA PARLIMENNYA DI PERAK

IPOH, 16 Nov (Bernama) -- Dua Anggota Parlimen MCA di Perak telah digugurkan daripada senarai calon parti itu untuk pilihan raya kali ini, kata presidennya Datuk Seri Dr Ling Liong Sik.

"Saya telah kemukakan senarai itu kepada Perdana Menteri Datuk Seri Dr Mahathir Mohamad dan sebelum beliau memberikan persetujuannya, kami tidak akan umumkan nama-nama itu," katanya kepada pemberita di sini.

Ling berkata pengganti kedua-duanya telah diberitahu tentang kemungkinan mereka bertanding dan untuk tidak membuang masa, mereka kini aktif menjalankan tugas parti.

MCA mempunyai tujuh Anggota Parlimen dan 13 Dewan Undangan Negeri di Perak.

Ling juga disoal mengenai kedudukan timbalannya Datuk Lim Ah Lek dan meminta wartawan bertanyakan sendiri kepada Lim yang turut mengiringinya dalam satu lawatan ke pusat penjaja di sini.

Lim, yang diura-urakan berhasrat mengundur diri, bagaimanapun enggan mengulas.

-- BERNAMA

HJ MAI